

REGIONAL NEWS

ADFA

Agriculture & Farmers' Welfare Minister Pu P.C. Vanlalruata'n Mizo infiammite chu ruihhlo a fihlim tur leh mahni inthunun thei turin a chah. Minister hian nizan khan Rajiv Gandhi Stadium, Mualpuiah Aizawl District Football Association buatsaih ADFA First Division League final a hman pui a. Pu PC Vanlalruata chuan, infiam mite zinga hun a hmang thei chu lawmawm a tih thu a sawi a. Football chu khawvel pum huap pawha game ngaihhlut hlawh a nih thu leh Mizote chem kalna tak a nih bawk thute sawiin, infiam mite chu theih tawp chhuah zel turin a chah a. Infiamna reng rengah mahni inthunun theihna leh ruihtheihthil laka fihlimte chu hlawhtlinna bul a ni tih tarlangin, chung chu hre reng a, hlawhtlinna chang chho zel turin infiam mite chu duhsakna a hlan s bawk a ni.

Final-ah hian Ramthar Vengin Ramhlun North chu goal hnih goal khata hnehin an champion a, final lut team pahnihte team te hi Mizoram Premier League season thar Qualifier khel turin an tling nghal a ni.

<><><>

SPORTS MINISTER

Nimin khan Sports & Youth Services minister Pu Lalnghinglova Hmar-in Kolasib Saidan-a Regional Sports Training Centre (RSTC) tlawhin a thawktute nen hmalak ngaihna laite an sawi.

RSTC, Saidan hi Sports & Youth Services Department enkawl a ni a, mipa naupang kum 17 chin hnuailam tana riah chilha football khelh zirna (residential academy) a ni a. District Sports & Youth Officer leh coach in an awmchilh a ni. Tun dinhmunah naupang 30 an awm mek a. Kumin May thla khan Bihar-a Khelo India Youth Games-ah Mizoram aiawha kalin Bronze medal an la a. Kumin September thla a Subroto U-17 Boys khelh zawh takah khan player damlo awm nual chungin semi final an thleng bawk a ni.

RSTC, Kolasib-ah hian Minister hi Warden Pu Zonunmawia leh Kolasib-a Sport department hnathawkte'n an lo dawngsawng a ni.

Pu Lalnghinglova Hmar hian nimin vek khan Kolasib District Football Association leh Reliance Foundation buatsaih Kolasib District Stadium-a Naupang League an khelh mek a tlawh a, naupangte chu football hmanga nun dik zir tel tur leh, tun atanga zu leh ruihhlo tichhin lo tura thutlukna nghet siam turin a chah a ni.

<><><>

PYF CONFERENCE

Ningani atanga tan hmarchhak Presbyterian kohhran thalai - Presbyterian Youth Fellowship (PYF)- inkhawmpui (Biennial Conference) vawi 25-na leh PYF kum 50 tlinna lawmna chu Youth Recreation Centre (YRC), Falkland a Central KTP, Mizoram Synod-in a thlen mek chu zanin hian a tiak ang.

PYF-in kum 2 dana inkhawmpui a buatsaih thina kumin thupui atan , "Lalpa'n thil ropui tak min tihsak e," ("The Lord Has Done Great Things for Us") tih a ni a. Rev. Lalchawiliana Varte, Cacher Hill Tribe Synod, Rev. Dr. Rosiamliana Tochhawng, Executive Secretary i/c Central KTP, Mizoram Synod, Rev. Dr. B. L. Nongbri, Principal JRTC leh Rev. D. C. Haia,

PCI Moderator hluite'n thupui an sawi a. Zanin inkhawmah Rev. S. C. Diengngan, PYF Leader kal chhuakin thu a sawi ang.

Zirtawpni chawhma dar 10:00 atanga chawhnu dar 4:00 thleng khan Thuampui Venglai Kohhran Biak-inah rorel a ni a. Inrinni nilengin Golden Jubilee lawmna hun hman a ni a, zanah Jubilee mei det a ni bawk. Tukin dar 8:00 khan Lalpa Zanriah Sakramen buatsaih a ni a, nilenga vantlang Pathian biak inkhawm hun hman a ni a, zanah chhunzawm a ni ang.

PYF Biennial Conference leh Golden Jubilee lawmna hi Mizoram Synod TV - Hruaina Eng bakah YouTube lamah Synod Information leh Central KTP channel-ah live-a pek chhuah a ni.

<><><>

CCM SEMINAR

Nimin khan Serchhip Kawnpui Presbyterian Kohhran Jubilee Hall-ah Kohhran thawhhona Council of Churches in Mizoram (CCM) chungchang zir ho a ni.

Zirhona-ah hian CCM lo pian chhuah dan leh hma lam hun thlirna tih thupuihmangin, CCM Gen Secy Rev Dr Lalmangaiha ziah chu ama kaihhruaiin zir ho a ni a. Group hrang hranga inthenin sawiho zui leh a ni bawk. Seminar paper-a a lan danin- Kohhran thawh ho rawtna hi kum 1949 ah intan tawhin, kum 1957, 1964, 1969 leh 1979 ah ah te pawh rawtna mumal tak a awm tawh a, an inhmukhawm zauh zauh tawh chungin, kum 1983 atang kha chuan he lam hawia thiltih hi a reh leh ta vang vang a. Nikum October ni 27 khan Council of Churches in Mizoram chu hawn a lo ni ta a ni.

CCM-ah hian kohhran pawl 9 Mizoram Presbyterian kohhran, Evangelical Church of Maraland, Evangelical Church of India, Independent Church of India, Isua Krista Kohhran Bualpui Ng, Lairam Isua Krista Baptist kohhran, Mizoram Baptist Kohhran, Wesleyan Methodist Church leh Zomi Baptist Church te an tel ani.

<><><>

PWD MINISTER

MNF party senior vice president Dr. R. Lalthangliana chuan PWD Minister Pu Vanlalhlana chu Dampa bial mipui vau-ah a puh.

Nimina West Phaileng a MNF unit hrang hrang inkhawmah Dampa biala MNF candidate Dr. R. Lalthangliana chuan PWD Minister-in bial hmasawnna tura hmachhawp mek, Pukzing leh Silsuri inkar kawng, North East Special Infrastructure Development Scheme (NESIDS) sum atanga a siamna tur awm sa leh siam tum mek chu ZPM candidate a tlin loh chuan ngaihtuah nawn leh a ngai ang, tiin sawi a ni, a ti a. PWD Minister thusawi hi Dampa bial mipui hmuhsitna leh tham lohnaah a ngaih thu leh a, sorkar thuneihna hmanga mipui rahbehna a ni, a ti a. Hetiang hi democracy rama thil thleng atan thil tih chi loh tawp a ni a, mipui inchung tlaka invauna tawngkam hmang tawh lo turin sorkar a ngen thu a sawi a ni.

Dr. R. Lalthangliana chuan, "He kawng hi a chhe em em a, Pick-up truck four-wheel pawh chhuk zawnga kal hleih theih loh khawpa chhe nasa a ni a ti a. Heng lai vela cheng khawsak harsa zawkte ei bar chawh luhna ber a ni nih thu leh a bikin damloh ni khuaah inphurh kual changin damlote an lainatawm tak zet a ni a ti a. Sorkar chu ngaih pawimawh hmasak berah neih ngei turin a phut a. Minister meuhin hetiang thu a sawi hi tak tak a ni dawn em ni ti a a ngaihtuahna laiin, Pu Vanlalhlana thusawi video hmuh tur a lo awm bawk si chu mak a tih hle thu a sawi bawk.

PC Party pawhin PWD Minister thusawi ni awm a sawi hi an dem thu an sawi a. Phuldungsei Community Hall-a PWD Minister thusawi video darhah Minister hian Pukzing leh Silsury inkar kawng, truck kal theihna tur laihna tur, pawisa pawh NESIDS atanga a awm vek tawh thu sawi a. Dampa bial by-election-a ZPM candidate Vanlalsailova thlan tlin a nih loh chuan ngaihtuah nawn a ngai mai thei niin a sawi a. A thusawi ngaithlatute sorkar thiltihtheihna hmanga a vau hi a tha lo an tih thu leh na taka an dem thu an sawi a. Hemi chungchang hi zirchian an tum thu leh Thawhtanni-ah ngaihtuahin a tul angin hma lak zui an tum thu an sawi a ni.

<><><>